

MAIGHISTIR-SGOILE—Fuirich, a Dhòmhnail, chan eil e idir cho furasda sin an gnothach a chur an dara taobh. Tha móran nithean ri thoirt fa-near. 'S e sin a bh'aig Comhairle *Chatto* ri dhèanamh, agus gu dearbh is dìcheallach a chaidh iad ris.

DONNCHADH—Chan iongnadh ged is e bancair a chuir iad air cheann an rannsachaidh. Tha *Catto* math air na cùntasan, thubhairt sibh?

MAIGHISTIR-SGOILE—'S e a thà agus cha b'fhuilear dha. Tha mi dìreach an déidh a bhith a' leughadh an iomraidh aige—leabhran tomadach—agus, air m'fhacal, b'fhasa leam là a' ruamhar gàrradh na sgoile na pàirt de'n leabhar aig *Catto* a thuigsinn.

DOMHNALL—An e gun tug e fead oirbh, a mhaighistir? Ma thug, bha e rìghinn, da-rìribh!

MAIGHISTIR-SGOILE—Thug e sin, fead orm. Chan e cùntas na cloinne bige a tha anns an leabhar aig *Catto* idir!

DONNCHADH—Seadh, is a bheil dad annasach aig *Catto* a thuigear bodaich nach d'fhuair móran sgoile?

MAIGHISTIR-SGOILE—Tha an leabhran a' cur an céill gu mionaideach gach dòigh air a bheil airgead 'ga chruinneachadh is 'ga phàidheadh a mach anns an Rìoghachd Aonaichte gu h-ìomlan, bho Thigh Iain Ghròta gus a' Chòrn. Tha iad air cùntasan a rannsachadh, agus fiogaran air an cur sìos aca, mu gach ceann cosgais is gach aobhar-buannachd—cìsean is airgead-cuspainn, tuarasdalan is cosgais-riaghlaidh, gach seòrsa reic is ceannachd, agus gach nì air an smaoinich sibh.

DOMHNALL—Seadh, is cìod an co-dhunadh a th'aca aig crìch an rannsachaidh?

MAIGHISTIR-SGOILE—Ma thà, anns a' cheud àite, mar a theireadh am ministear, tha *Catto* is a chuideachd de'n bheachd gun gabh tighinn-a-stigh is cosgais an Riaghaltais an Albainn a chur an céill, eadar-dhealaichte bho'n tighinn-a-stigh is bho'n chosgais a bhuineas do Shasann. 'S e sin, théid aca, ma thogras iad, air innse gu soilleir na tha air a thogail de chìsean an Albainn, agus na tha an Riaghaltas a' cosg de airgead an Albainn.

DOMHNALL—Seadh, is gu dé am barail air sin? A bheil sinn a' pàidheadh a mach barrachd air na tha sinn a' toirt a stigh? Is mi a chreideadh!

MAIGHISTIR-SGOILE—Sin ceist nach deachaidh fhuasgladh fhathast. Cha robh aig *Catto* 's a chuideachd ris a' cheist sin fhuasgladh ann. 'S ann a bh'aca ri rannsachadh an gabhadh ceist mar sin fhuasgladh, agus tha iad ag ràdh gun gabh. Ghabhadh e móran saothrach, gun teagamh, ach ghabhadh e dèanamh.

DONNCHADH—Chan eil mi fhéin a' faicinn gum biodh e doirbh idir. Nach innis na ciseadairean dhaibh dé an t-sùim a tha iad a' togail bho thuarasdalan is bho thighinn-a-stigh sluagh na h-Albann?

MAIGHISTIR-SGOILE—Cha bhiodh sin cho soirbh 's a shaoileadh sibh. Gu dé mu dheighinn dhaoine an Albainn a tha a' tarraing riadh is prothaid á malairt anns a bheil làmh aca an Sasann? Cha bhiodh e idir idir furasda cuid na h-Albann is cuid Shasainn de'n chis a chùntas air leth. Agus a thaobh cosgais—.